

# Dapli rumantsch en scola media

DA MARTIN CABALZAR/FMR

■ **Las scolas medias en il territori rumantsch duain vegnir obligadas da rinforzar e promover spezialmain il rumantsch. Quai resorta d'ina dumonda parlamentara che deputà Lorenz Alig (pld Foppa), sustegni da 48 collegas, ha inoltrà en il cussegl grond.**

La lescha da scolas medias vertenta pretenda ina purschida decentrala che tegna quint da las relaziuns linguisticas e regiunalas. Cuntant duai vegnir garantì in access egual da scolaris tudestgs, rumantschs e talians a la scola media. Sco quai che *Lorenz Alig* punctuescha ha la regenza uss da nov er la pussaivladad d'obligar las scolas medias en il territori rumantsch da promover spezial la lingua rumantscha. En vista a la mancanza eclatanta da persunas d'instrucziun en lingua rumantscha duain betg mo la Scola media ad Aschera, mabain era las scolas medias en il territori rumantsch avair la pussaivladad d'absolver la matura en la sparta da pedagogia.

## Novas cunvegns da prestaziun cun las scolas medias privatas

En vista a la concessiun da las novas incumbensas da prestaziun per las scolas medias privatas en il territori rumantsch vulan ils interpellants savair sche la regenza è pronta d'obligar questas scolas da promover il rumantsch a moda speziala e sch'ella è er pronta da metter a disposiziun ils meds finanziels supplementars persuerter. Plinavant vul Alig savair co la regenza giuditgescha la cuntradiziun



Deputà Lorenz Alig (pld Foppa) vuless rinforzar il rumantsch en las scolas medias. SOMEDIA

tranter la garanzia d'ina purschida decentrala che resguarda ils basegns linguisticos e la disposiziun ch'Aschera è il sulet lieu nua ch'ins po acquistar la matura en il rom pedagogia. Concretamain duai la regenza s'exprimer co ella vul garantir en l'avegnir ina purschida decentrala da scolas medias spezializadas en las regiuns rumantschas e talianas.

## Obligatori da rumantsch da la scolina a la scola media

En la medema crenna ha er gia dà *Rico Valär*, professor per litteratura rumantscha a l'Universitad da Turitg. Er el ha constatà che pervia d'enconuschientschas linguisticas manglusas manchian scolastas e scolasts da lingua rumantscha.

Per ch'il rumantsch haja in avegnir dovria dapli rumantsch baint scolada. Valär pretenda perquai in'instrucziun da rumantsch nuninterrutta da la scolina fin a la matura per uffants che creschan si en la Rumantschia. Tgi che perdia numnamain en sia carriera da scola il connex cun ses linguatg, a quel manchian las premissas per la professiun da scolast ed er la cumpetenzza e la motivaziun per studegiar rumantsch, constatescha Valär.

Er il rapport dal Center per democrazia è vegnì a la medema conclusiun. Il minister d'educaziun *Jon Domenic Parolini* di che per in obligatori stuessian ins midar la lescha. Dentant vul el s'entupar cun ils recturs da las scolas medias per sclerir co ins possa far quai tant pli svelto.